

浙江省地方志编纂委员会整理

重修浙江通志稿

标点本

【第四册】

建置考 名胜古迹考

民国 浙江省通志馆编



方志出版社

浙江省地方志编纂委员会整理

重修浙江通志稿

标点本

【第四册】

建置考 名胜古迹考

民国 浙江省通志馆编



方志出版社

《重修浙江通志稿》第二十七册 建置考

第八编 建置考

叙 例

建置一编，首列城池，次详官署，而殿以祠祀。以史迹为经，以地理纬之，而一省之人文掌故备焉。盖先举城池论之，吾浙旧辖为府十一，为县七十有余。府治必有城，县则僻远之区，往往仅置门栅，而无城墙。按之往史，越中诸城，多托始于句越，浙北各县，或权舆于孙吴。及吴越割据，南宋偏安，设置始得完备。元初隳天下城邑，浙中所毁几什七八；元末兵干四起，方重筑以资防御。明初汤信国公沿海筑城以防倭，嘉靖间以备倭大加修缮。清顺治中，命各府县城，皆增高并堵；雍正间总督李卫檄令全省兴修；洪杨之后，各县官民，又合力营缮。此浙中各城兴修之概况也。及民国肇建，省会首先拆城。北伐告成，各县城亦多奉省令拆毁；中日战起，以战略关系，城邑隳毁尤多。此浙中各城毁废之概况也。若列举而数之，则一城一池之兴替，莫不有史实可据。而古城一表，尤与各县文献有关，故考据不厌其详。惟前人于建置城地，往往参合阴阳术数之学，如掘二十八井以应二十八宿之类，涉于迷信，概屏不录。古城表之后，殿以古宫考征，使千百年后，犹可想见小朝廷当年規制，虽朝市沧桑，遗迹久已湮没，亦征文考献之一助也。至于公署祠宇，非本人所主编，不敢越俎为谋，僭定叙例，后有作者，以此为滥觞，斟酌损益，而订定之可也。民国三十八年三月十日，鄞县周岐隐书于省通志馆印。

建置考目录

第一章 城 池

第一节 历代建置及修浚经过

(甲)省会及浙北各县

(乙)浙东各县

(丙)浙西各县

(丁)浙南各县

第二节 现时毁废情形

附:古城表

宋古宫考证

第二章 公 署

第一节 省议会议场

第二节 省级行政公署

第三节 县级行政公署

第四节 各级司法公署

第五节 其他公署

附:废署表

第三章 祠 庙

编者附注：本人所认编者，为第一章一二两节，第二三章，由别手编辑，以原定目录如此，故并录之，主稿者或有更动，略为变通可也。

建置考

第一章 城 池

第一节 历代建置及修浚情形

(甲)省会及浙北各县

省会旧杭州府城,辖钱塘、仁和二县。今为杭州市。即杭州府城,西南属钱塘县治,东北属仁和县治。隋开皇十三年杨素始筑城,周三十五里有奇。《大清一统志》案:《元丰九域志》云:隋杨素创州城,周四三十六里九十步。唐昭宗大顺元年闰九月,杭州防御使钱镠筑新夹城,环包艮山泊秦望山而迴凡五十余里。景福二年,钱王率十三都兵泊役徒二十余万众,新筑罗城,自秦望山由夹城东亘江干泊钱塘湖,霍山范浦,凡七十余里。节录《吴越备史》,互见《古城表》。时城垣南北展而东西缩,故曰腰鼓城。《七修类稿》。梁开平四年八月,钱王定捍海塘基,复建候潮、通江等城门。《吴越备史》。案:据乾道《志》:钱氏旧门,南曰龙山,东曰竹车、南土、北土、保德,北曰北关,西曰涵水、西关。又据《神州古史考》,钱氏罗城,有通越门、双门、朝天门、龙山门、竹车门、新门、南土门、北土门、盐桥西关门、北关门、宝德门,无候潮、通江二门。候潮门,乃宋绍兴时筑;通江门,旧《志》无考。是岁广杭城筑子城。《十国春秋》。宋绍兴二年春正月己未,修临安府城。《宋史·高宗纪》。时霖雨城坏,诏以修内司所集湖秀等五州役卒就筑之。嘉靖

《浙江通志》。二十八年，增筑内城及东南之外城，附于旧城，为门十有三。万历《志》。东曰便门、候潮门、保安门又曰小堰门、新门、崇新门俗呼荐桥门、东青门俗呼菜市门、艮山门，西曰钱湖门、清波门俗呼暗门、丰豫门旧名涌金门、钱塘门，南曰嘉会门，北曰余杭门。水门五，曰保安水门、南水门、北水门、天宗水门、余杭水门。嘉靖《志》。元既取宋，禁天下修城，以示一统，而内外城为居民所平。至正十六年，张士诚陷姑苏，据浙西五郡，十九年发松江、嘉兴、湖州、杭州民夫筑焉，昼夜并工，三月而完成。周六千四百丈有奇，高三丈，厚视高加一丈。嘉靖《志》。自艮山门至螺蛳门以东，视旧则拓开三里，而沿市河于内。自候潮门则缩入二里，而截凤山于外。门仍一十有三，东无便门、保安二门，北增天宗、北新二门，南嘉会门改曰和宁门。成化《志》。明太祖命李文忠取杭州，遂因之为省城。门省为十，东城五门，曰候潮、永昌、清泰、庆春、艮山；西城三门，曰清波、涌金、钱塘；南城一门曰凤山；北城一门曰武林。为水门四，在凤山、候潮、艮山、武林各门之旁。旧《浙江通志》。成化十一年，左布政使宁良，议于钱塘门左、涌金门右开九渠之一为河，以导湖水，于是开为水门，阔七尺，高九尺，入深四丈九尺。嘉靖三十四年二月，倭将犯杭，提学副使阮鹗，增筑钱塘门月城。十二月，督抚胡宗宪于清波门南城上筑定南楼，凤山门西城上筑襟楼各一座。三十五年，武林、钱塘二城外，各浚濠甃闸，上构吊桥，环城皆辟有深池。是年秋霖雨，湖水冲圯钱塘门北城十余丈，乃塞濠并毁桥闸焉。万历《志》。万历三十一年，督抚尹应元、右布政范涑，议大修城，凡二年竣役。万历《钱塘县志》。崇祯十五年，总督李率泰檄府增高女墙，并二为一。旧《浙江通志》。清康熙五年，永昌门毁，总督赵廷臣重建，改永昌为望江。《钱塘县志》。二十四年，巡抚赵大麟捐俸修楼橹之颓圯者。雍正五年，巡抚李卫修城。康熙《杭州府志》。自乾隆以后，城垣修治，均无案牒可稽。同治三年，省城克复，大加缮治。其后岁时修葺，见于档案者。同治十三年，修庆春门城墙。光

绪元年,修清泰、艮山、凤山、钱塘、涌金、清波各门城墙。十年,修涌金门起至云居山钱王祠一带,城墙八十二丈。民国《杭州府志》略。驻防旗营在省城内西隅,清顺治七年增筑满洲驻防营于城内,周十里凡五门。《大清一统志》。水门三。《城西古迹考》。城既筑,兵民始隔。康熙《仁和县志》。咸丰十一年,太平军入杭州,营城毁者半。同治三年重事修葺,光绪初重葺南门。《防营小志》,酌参民国《杭州府志》。民国初隳营城为市房,今其地犹名旗下。采访册。

杭州城隍(即护城河流)东南自浑水闸河流至候潮门东,循城而北,经艮山水门又转西,直至武林水门,南自清波门,北抵钱塘门,因近西湖,以西湖为隍,自钱塘门西,绕城至武林门西,乃导西湖之水,以为隍焉,自清波门南上至凤山门一带,有凤山限之,石不可凿,是以无隍。民国《杭州府志》。案:城隍浚修情形,元贡师泰有《杭州新城碑》,清丁澎有《赵中丞重修省城记》,备载《府志》中,不复具录。

海宁明初改盐官州为海宁县。县城周四百六十步,高二丈,唐永徽六年筑。咸淳《志》。旧城入元久圯,至正十九年,江浙行省命左右司都事陈元龙重筑。高一丈五尺,周七里五十步。万历《志》。濠广五丈,南临海无濠。《清一统志》。明洪武二十年,沿海设卫所备倭,信国公汤和增筑城五尺。永乐十五年,都指挥谷祥加堞二尺,共计高二丈二尺,城门五,东曰熙春,南曰镇海,西曰安戍,北曰拱宸,东北曰宣德,每门有楼;有水门三,一在拱宸门西,一在宣德北,一在安戍门南。嘉靖三十四年,邑令蔡完以倭警浚,加高城砖五尺,增添女墙及巡警铺四十五所,敌台二十四座,浚城河加深五尺,共深一丈五尺。旧《海宁县志》。清顺治十一年,知县秦嘉系缮城浚濠,又构层楼于拱宸门。康熙《志》。康熙十三年,知县许三礼修城九铺。十九年城坏,重加修葺。雍正五年,知县胡杲修筑,楼橹一新。雍正《通志》。道光二十一年,知州许发和重修。《海昌县志》。同治五年西门城墙圯,水门石梁断,知州靳芝亭重修。民国《杭州府志》。

富阳 县城周六里，门四，西北环门有濠，东南临江；《清一统志》。周六百步，高一丈，濠阔一丈五尺；旧传咸通十年，县令赵讷修筑。咸淳《志》。案：据《名胜志》云：唐赵讷筑城，去今城二百七十步。元至正十六年，江浙行省参知政事者杨完者重筑，周回三里，元末毁。成化旧《志》。明嘉靖三十五年，知县桂轹筑城于旧城东南，广六里，延袤一千丈有奇，厚二寻，高一丈四尺，内外俱甃以石，雉堞一千二百堞；为门者四，东曰升平，南曰萃和，西曰康阜，北曰连顺，俱有楼；又开三小门以便出入，并开水门，以疏奔湍；隆庆五年分守参政李淑于儒学前辟门，曰“文明”。万历《志》。清康熙十年，知县平夬重修；二十年，知县钱锡晋捐俸修筑东南二面城，建南门大观楼；《富阳县志》。雍正七年，总督李卫委知县朱永龄浚城内并北门外一带河道。雍正《通志》。

余杭 旧县城在溪南，周回六里二百步。东汉熹平二年，县令陈浑徙于溪北，后复治于溪南。后唐时号清平军城，钱武肃王广修其濠。宋雍熙初，再徙溪北，周五百四十三丈，高一丈三尺，下广一丈五尺，濠阔二丈五尺，城门四，曰荣春、湖光、迎波、永丰。咸淳《志》。案：《清一统志》云：城周三里有奇，门四，南临苕溪。旧城入元圯。至正十六年，江浙行省参知政事杨完者，仍于溪南筑城，周三里，内附后毁。成化旧《志》。明正德九年，知县唐鹏重建四门。嘉靖《余杭县志》。嘉靖三十五年，知县吴应徵，因寇乱筑城，自西迤北至东五百丈，高一丈八尺，自东迤南至西二百三十丈，高三丈二尺；周广一丈六尺，雉堞一千三百四十三堵；为门四，南曰对熏，北曰拱极，东曰宾阳，西曰秩成；无濠，南临溪有水门二。万历五年，知县濮阳秉重建通济桥南关一座，安乐桥南关一座，皆甃石为台，下为门。万历旧《志》。万历三十二年，知县程汝继以形家言四门不宜相对，徙北门过西三十丈，东门过北三十丈，东门外增筑月城，曰启秀。四十二年，临溪东南城圯三十余丈，知县戴日强重筑。《余杭县志》。清康熙十年，知县张思齐续加修筑。康熙《志》。康熙二十二年，知

县龚嵘增修。雍正六年，知县何悦重修。雍正《通志》。

临安 唐垂拱时复置临安县，未有城，五代时吴越增筑。《城邑考》。案：民国《杭州府志》：吴立临水县，晋改临安。晋时之城，见《水经注》，所谓因冈为城，南门尤高者是也。旧《志》谓其城在今城之北，不可考矣。今城为吴越时建，宋元迁移，明始复故。是吴越之城，即今城旧址。依太庙山，周五千五百六十步，池在东北，钱镠时名衣锦城，为门四：东曰迎恩，西曰惠政，南曰望锦，北曰拱宸，后圯而址犹存。明洪武初迁县治于东市；嘉靖五年，令廖瑜仍立四门，东曰会锦，西曰聚金，南曰迎薰，北曰拱极，街巷各立木栅以防夜警。万历《临安县志》。设土垣，周五里，门四有濠。《清一统志》。三十四年，令魏希古设为土城以防倭，年久亦圯；万历三十六年，令黄鼎象修理四门，补筑城垣，门固而垣被雨坏。万历《临安县志》。清初以土垣内外，俱属民产，随业修葺，岁以为常；咸丰洪杨之役，城圯；光绪十六年，知县杨宗瀛重建；二十六年，知县陈为鉴修垣墙，并建南北栅门。光绪《县志》。今城垣圯损不全，东西二门尚有楼与门，南北二处仅有颓垣几板，竟无门以司启闭，未闻有捐资修城者，有城等于无城矣。民国《杭州府志》。

於潜 古城在县西北，相传隋杨素筑。今城周四百五十二步，高一丈五尺，厚五尺，基厚一丈八尺，濠阔一丈八尺，深四尺。咸淳《志》。元至正十七年，江浙行省参知政事杨完者重筑，自金鹅峰而西，由石龙口直抵县后山，周五里，高一丈五尺，厚一丈，濠阔一丈；为门三，西曰锦江，南曰迎恩，北曰仰山，其东则山势逼阻，不置门。咸化旧《志》。明洪武初，以县非控要之地，且冈陵重复，遂不置城。《清一统志》。后城毁濠堙，门虽存，而城濠故迹不可复考。《於潜县志》。清初山贼为乱，三门悉遭焚毁；康熙二十三年，知县刘国儒重建，日久渐圯，屡次修整，颇为坚固；洪杨之后，南北二门，重筑以仍其旧，而西门则不复存矣。《於潜县志》。案：据采访册，抗战胜利后，改南门为胜利门，北门为复兴门，互见第二节。

新登 因山为城，周二千五百七十一步，高二丈三尺。唐昭宗大顺二年，吴越杜棱筑，罗隐撰记。门四：东曰熙春，南曰太平，西曰顺成，北曰宁海。咸淳《志》。案：万历旧《志》云：咸淳《志》有宋天禧五年三月，知杭州王随撰《筑新城记》，则宋尝筑城矣，今无考，记亦阙。凿隍引堰水注之，堰去城八里，往往不得达。明天顺六年，郡守胡濬至邑相度，筑塔山堰，开溪道流以入濠，濠内地接通城河，凡五里许。《新城县志》。嘉靖三十四年，因倭乱，知县范永龄筑城周三里许，高一丈六尺，厚倍之；为门者四：东曰元始，南曰亨通，西曰利遂，北曰贞成。万历旧《志》。东门旧有二，后塞其一，万历元年重开，共为门五。三年知县温朝祚增筑女墙，池环如城。旧《浙志》。清康熙十一年，濠淤，知县张璜重浚之。康熙《志》。雍正五年，知县罗煊增修。雍正《通志》。乾隆三十二年，知县叶和春修理城垣；嘉庆二十二年，知县张树勋，疏浚城濠；至二十五年，知县武新安接任始竣，改南门为嘉会门，又于东门之左辟昭阳门。《新登县志》略。同治二年，知县姚原焯修；光绪二十六年，知县关钟衡，修城之西北隅。民国《杭州府志》。

昌化 县城周七里，门三有濠，元末筑。《清一统志》。至正十七年，江浙行省参知政事杨完者筑。成化旧《志》。高一丈五尺，广如之，门三：东趋京，西三瑞，南登龙，北负唐山不设门，南因溪为池，后圯。嘉靖《浙江通志》。明隆庆三年，知县周易虚创东西二关。万历旧《志》。万历二十一年，知县周洛都因岛逆告警，于关内开拓旧规，各建城楼三，加睥睨女墙，临溪屹立。今东西郭及城东门，惟毁堞仅存。康熙《志》。清康熙三十六年，知县林培，修筑东西两关。嘉庆三年，知县张宗轼重筑东门，五年复修东西二门，改趋京曰景华。《昌化县志》。

嘉兴 旧嘉兴府治，辖嘉兴、秀水二县，合并为嘉兴县。唐乾宁三年，嘉兴镇将曹信筑。柳《志》。案：《吴越备史》谓：唐文德元年，吴越武肃王命制置使阮结筑，前《志》二说并载，然阮结所筑城，今已久堙。五代晋

天福四年，升县为州，五年吴越王元瓘，拓为州城。宋谓之军城，元谓之路城，又谓之罗城。柳《志》。周围一十二里，高一丈二尺，厚一丈五尺。《府志》原注云：洪武中重筑府城，西南隅一角缩三里，即今所云九里十三步也。凡四门，门各分水旱，上各有楼。东门旧曰青龙，后为春波；西门旧曰永安，后改通越；南门旧曰广济，后改澄海；北门旧曰广济，后改澄海；北门旧曰望京，后改望云，续改望吴。宋宣和间，知州宋昭年尝更筑。徐珉作乱，遂废澄海水门楼。德祐元年，守臣余安裕重修。元至元十三年，隳郡县城，罗城平，惟子城存。至元《志》，参赵《图记》。元末兵起，守臣议防御。至正十六年，路推方道叟各志俱作方叟，今考碑碣名道叟。复营罗城。二十四年，同知缪思恭重筑未就，明知府吕文燧、谢节始竟其役。东旧三里，高倍于旧二尺，面阔一丈，女墙三千四百一十五，月城四；吊桥四，城楼四。城濠南引鸳鸯湖水，西引漕渠，并周罗城，会于望吴门外北丽桥西北，深一丈二尺，阔二十二丈。《嘉兴府图记》。嘉靖三十四年倭寇郡城，知府刘憲亟筑四水门，增埤缮隍。事宁，郡守侯东莱奉檄增高一丈二尺，帮岸三尺，改东门曰澄霁，西门曰阜成，北门曰拱宸，南门曰迎薰。万历七年城圯，知县朱来远修。二十年，李培加修子城，增高三尺。万历《秀水县志》。四十四年，知府庄祖海倡筑箭楼窝铺马坡，凡八阅月而工竣。天启二年，知县汤齐，修筑城堤及堵。清顺治二年东城楼毁，嘉兴县知县张厥修重建。十五年增高城垛，并二为一。康熙四年，南水门圯，嘉兴县知县林逵重筑。康熙四十九年，筑水关于西城。雍正五年，巡抚李卫，奉谕察勘兴修，重建门楼四座，每座增加一层，又于澄海门之东，春波门之西，建魁星阁一座，睥睨坚整，闾阖一新。雍正《通志》。乾隆二十七年，风潮异涨，城根受淹松淹，嘉兴知县李化，秀水知县孙尔周，各勘所辖圯城楼城圈，三十一年，兴修工竣。道光间海氛不靖，知府徐敬勘修内外城身垛口及附近炮台。同治三年，清兵攻洪杨军，轰坍北门城垣，并及东西各门，知府李甫田，绅士张清泰修筑之；四年，

知府许瑶光重建南门城楼；五年，又修小西门大西门；八年，嘉兴知县臧均之详准修葺。光绪《嘉兴府志》。城垣周围九里十三步，嘉兴县分管自东门内内马王庙前起，由南门至小西门古井庵前止，长一千三百八十六丈九尺；秀水分管，由小西门经北门至东门，长七百八十丈八尺。伊《志》略。子城周回二里十步，元有正门一曰丽谯，子城者即子墙，宋之军州，元之路衙，今之府治墙也，相传吴黄龙时所筑。《府志》略。

隍池周围绕城，其里数与城加四分之一，阔二十二丈，深一丈二尺。其历代疏浚情形，并与城同。四门外各置吊桥，跨隍城以通往来。《府志》略。

嘉善 旧无城。明嘉靖三十二年，倭寇内侵，巡抚王忬因、知府刘恂奏请筑城，命本府通判邓迁董其事。辟水门五，陆门四，东曰大胜，西曰太平，南曰庆丰，北曰熙宁；周一千四百八十八丈，高二丈三尺五寸，厚二丈二尺，计六里二百七十步；濠周于城，阔六丈。《嘉善县志》略。万历二十年，知县章士雅修；崇祯十年，知县李陈玉更修；清顺治十五年，知县方舟增修；康熙二十三年，知县崔维华，开浚城河；二十五年，知县严弘祖重建西门城楼；二十八年，知县李之藻重建东门城楼；四十三年，知县于舜枚，重筑东水门；五十三年，知县梁文熈重建南水门；五十八年，知县孙锦重修西水门。雍正《通志》。雍正八年，知县郅煜，重建东西二城楼；乾隆三十三年，知县黄宗伊，重建南北二城楼，修东西城楼炮台六座；同治六年，东门水关圯，知县凌卿云重建；十三年，知县丁绍德详修南门城垣及西南水关。光绪《嘉兴府志》。

海盐 城在吴御越城西北。唐开元五年，就马嗥置城，即今治也。互见《古城表》。周六里三十五步，高二丈五尺；池周一千三百四十丈，深一丈二尺，广六丈九尺；陆门四：曰靖海，曰望吴，曰来薰，曰镇朔；水门南西北三，跨濠门各有桥。明洪武十七年，设宁海卫于是城，是年浙江都指挥使司，以信国公命，檄宁波卫指挥许能

加筑,永乐十六年,都指挥谷祥复葺之;嘉靖三十二年,都指挥张铁有外墉之筑;明年知县郑茂增筑子城四,并城敌台十有八,岁久城圯;万历二十一年,知县王临亨重筑。《海盐县图经》略。清顺治十五年,知县毛一骏奉檄增高并堵,重建东西二城楼;十六年,游击郭光斗筑城浚池;雍正五年,知县王仕正奉檄重修城垣;乾隆二十八年,知县沈金达请项兴修;嘉庆三年,知县任泽和捐项重修四门城垣。光绪《嘉兴府志》。

附:澉浦城 在县西南三十六里。明洪武十九年,命安庆侯荭阳侯委海宁千户费进筑土城,周围八里二十七步,高二丈四尺五寸;永乐十六年,都指挥谷祥,以砖石包砌;正统八年,命侍郎焦弘、参政俞士悦勘议备料重修;嘉靖三十三年,知县郑茂增筑,并敌台十六座,陆门四,水门一;清顺治十五年,同知冀应熊奉檄重修;康熙五十七年,知县梁泽重修;乾隆二十八年,知县沈全达重修。光绪《嘉兴府志》。

平湖 县无城郭。明嘉靖三十二年,岛倭为乱,署县事推官殷廷兰奉檄筑城;三十五年,知县刘存义图度形势,审定疆理,规制稍具;三十五年,知县陈一谦设东北二瓮城;四十一年,知县顾廷对增女墙崇雉堞,并高五尺,置窝铺百有十二,城宽九里,陆门东曰启元,西曰毓秀,南曰豫泰,北曰丰亨,其西南曰小南门,水门西南北各一,东据当湖巨浸为二。清顺治十八年,增高城堵;雍正二年,知县林绪光,详请开浚城河,东水门久经淤塞,因疏东门玉带河,并开水门,居民便之。雍正《通志》。五年,知县杨克慧奉檄重修城垣;九年,知县方以恭复浚水道,名曰永新;乾隆二十八年,知县刘国垣,复修城隍;乾隆五十二年,知县王恒捐俸重修城垛城楼;嘉庆九年,知县路鐔,二十三年,知县刘肇绅,道光三年,知县胡述文,各捐廉详修;九年,胡述文捐廉再修,并开浚水洞;同治七年,知县郭恩观,九年,知县邢守道,先后请帑修葺。光绪《嘉兴府志》。

附:乍浦城 县东南二十七里。明洪武十七年,信国公汤和

居守，累土列亭障；永乐十二年，都指挥谷祥，始用石甃；正统八年，久雨颓塌，勘议今湖杭二府，佐嘉兴府葺治；景泰三年，都指挥使王谦，设城楼四，栏楯杆櫓俱备；嘉靖二十三年，知县刘存义增筑，并建敌楼十，以眺海帆，谨烽候，城形正方，宽九里，高二丈，广一丈五尺，陆门四，水门一，濠阔一千六百三十丈，深八尺，阔十丈，吊桥四。平湖程《志》，参《乍浦志》。崇祯十一年，署知县李怀玉，开设东南水门一座。清雍正五年，移满州驻防官兵，驻扎乍浦，缮城浚池，竣整深固。雍正《通志》。乾隆十年，知县高国楹浚濠；十三年水门内并筑石闸；二十五年，知县刘纯炜修城垣；三十一年，知县周昭仔奉檄重修，并建城楼；道光三年，知平湖县事胡述文捐俸重修，并修浚水门。光绪《嘉兴府志》。

附：梁庄城 县东南四十里。明正统五年，巡按李奎，以海门要冲，奏建大寨，筑城周八百丈，高一丈五尺，城楼二，角楼四，置兵守御；嘉靖四十年，知县顾廷对申请移乍浦巡检司居之；清置梁庄三寨烽火台。《通志》，参《府志》。

崇德县 元末张士诚据苏州，于本县筑城周五里余，置城门四，水门三。明洪武十九年，海宁卫奉左军都督府勘合，将砖石拆运公用，旧址尚存弘治《嘉兴府志》略。是年倭寇海盐，徙城乍浦；天顺间，王令輿立四门为障；嘉靖三十四年，倭入寇，蔡令本端奉檄度地甃筑；明年五月城完，凡七里余三十步，高二丈七尺，阔一尺，城门水陆各五；三十九年，刘令宗武再建城楼四，南北瓮城各一座，添筑箭台三十，敌台三，濠周于城。雍正《通志》，参《石门县志》。入清屡加修浚，咸丰十年，洪杨之役，自南水门迤东，至北门一带，城垣悉毁；同治五年，署县事杨恩澍，详请建复如旧，并葺治西南城，知府许瑶光泐石为记。光绪《嘉兴府志》。

桐乡 明宣德五年立县，尚无城。天顺初，邑令张泰，成化中孟俊，正德中任洛等，俱创筑未完。嘉靖三十二年，知县金燕至奉巡抚王忬檄筑成之。南门曰时薰，东门曰青阳，西门曰兑悦，北门

曰来远,周一千二百丈,外高三丈一尺,内高一丈四尺,面阔一丈八尺,脚阔二丈二尺,上砖下石,水门四,城楼四,月城四,台十二,濠周于城,广六丈,深二丈五尺。清顺治三年,建月城锁亭八座。十七年,知县王好仁;康熙十四年,知县徐东元;二十四年,知县何金兰;三十四年,知县郭金汤;雍正五年,知县王谔;乾隆三十三年,知县李天锡,迭加修葺。同治初年,城垣坍塌,知县富拉浑重修之。雍正《通志》,参《桐乡县志》、《嘉兴府志》。

吴兴旧湖州府治,辖乌程、归安二县,今合为吴兴县。子城相传为项王故城,即古乌程县治。隆庆《湖州府志》。罗城,唐武德四年,李孝恭筑,周二十四里;景福二年,刺史李师悦修。宋太平兴国三年,奉敕拆毁子城。绍兴三十一年,知州陈茂之,重修罗城。元至正时,伪周平章潘原明,以旧城宽而不固,乃筑小之,周一十三里一百三十八步,复建楼橹于上。唐开九门,放生池侧有阊门定安门,东西各有瓮城,并废;宋门六,今因之,东曰迎春通运河,西曰清源通苕溪,南曰安定通余不溪,北曰奉胜,俗呼霸王门,止有水门,雪水支流所出,东北曰临湖出雪溪通太湖,西北曰迎禧,俗呼清塘,止有陆门,壕周罗城外,潘原明改筑时所开也。雍正《通志》,参旧《湖州府志》。清顺治十五年,增高并堵;雍正五年,巡抚李卫奉檄委知府唐绍祖督修,高二丈六尺,阔二丈五尺,自西门至东北之枰锤潭属乌程,东南各门属归安;咸丰间增修城堵;同治十年,知府宗源瀚督修。光绪《湖州府志》略。

长兴一名夫槩城。《元和郡县志》:吴王阖闾使其地夫槩王筑城于此。又谓之雉城。《府志》:以县有雉山得名。晋隋之间,县治迁徙不一。唐武德七年,徙县治于今所,辅公柘犇土而筑,岁久复圯。旧《湖州府志》。宋天圣中重修,有七门。明元帅耿炳文始筑今城,比旧城减小,甃筑甚固,高三丈,宽二丈八尺五寸,周九百二十九丈;城门六:东曰神武,南曰嘉会,西南曰承恩,西曰长安,北曰吉祥,东北曰宜春,各有瓮城;水门二:东曰清河关,西曰大雄关,上有门亭;

沿城浚濠，阔七尺，深一丈五尺，引箬溪之水入城。岁久圯。嘉靖丙辰，知县黄宸修，建楼于六门之上，置窝铺三十。顾应祥有记。万历三十四年，知县熊明遇，因城河久壅，开浚内河，延袤三百六十丈，加深五尺，加广五丈，外河深广亦如之；崇祯二年，知县向鼎修筑清河关，视旧阔三尺；八年知县吴钟峦修大雄关，高广亦视旧加三尺。清康熙十年，知县韩应恒开浚城河；六十年，知县晏士杰浚城河有碑；雍正五年重修；乾隆十二年，知县谭肇基，三十一年，知县方伯俱重修；四十七年，开浚城河；嘉庆六年，知县邢澍修城。雍正《通志》，参《长兴县志》。

德清 旧无城郭，宋末始筑石城，明初以修海塘，徙用其名，止存土郭。县联络溪山，因兜汊而为池，倚冈丘而成埕，延袤四五里；启七门：东曰行春临溪，西曰西成清商，南曰见山广储，北曰武塘。隆庆《湖州府志》。嘉靖二十五年，知县冯焕于要路四门，各围以石，上作望楼，易临溪曰拱乾，易广储曰峻明，易西成曰宾廛，易武塘曰礼辰。三十二年，倭寇犯浙，署县事推官方敏，建议城之水门五，又西水门一，陆门五，废见山清商临溪，而益以迎薰，其拱乾易为文昌，城周七百七十三丈五尺，高二丈三尺，阔二丈《德清县志》。清康熙二十三年，知县王廷让，雍正五年，知县朱永龄，八年，知县钱学洙，乾隆三十三年，知县阮芝生迭加修葺。光绪《湖州府志》略。

武康 无城，惟累土为缭垣。《清一统志》。

安吉 元至正十六年，明兵克安吉，总管张俊德，始筑土为城。后元帅费愚，重甃以石，延袤六里，高二丈有奇，广半之。门四：东曰宾阳，西曰宝成，南曰丽正，北曰拱宸。城濒大溪，引水为濠；岁久城圯濠亦堙塞。嘉靖壬子知州林璧重修，甲寅知州江一麟复加高二尺，内土岸以石甃之。清雍正五年，奉敕重修。光绪《湖州府志》。

孝丰 明弘治初设县，先是知府王珣，相有汉故城，因筑土垣，周六百一十丈。万历四年，知县王国宾，更为石城，广六百七十九